



Број/Број: **03/1-50-1-7-48/09**
Сарајево/Sarajevo, 9. 3. 2010.

Z A P I S N I K

48. sjednice Zajedničke komisije za odbranu i sigurnost BiH Parlamentarne skupštine BiH, održane 9. 3. 2010., od 10 do 12,30 sati

Sjednici su prisustvovali sljedeći članovi Zajedničke komisije: Branko Zrno, Šefik Džaferović, Slobodan Šaraba, Vinko Zorić, Drago Kalabić, Ivo Miro Jović, Selim Bešliagić, Hazim Rančić i Adem Huskić.

Odsustvo su opravdali: Mirko Okolić, Dušanka Majkić i Sulejman Tihiić.

Sjednici su prisustvovali i gosti, predstavnici medija, kao i predstavnici Sekretarijata Parlamentarne skupštine BiH:

- Sefer Halilović, poslanik u Predstavničkom domu Parlamentarne skupštine BiH,
- Marina Pendeš, zamjenica ministar odbrane BiH,
- Mate Miletić, Odbor za žalbe građana Parlamentarne skupštine BiH,
- Zoran Jovanović, kabinet predsjedavajućeg Vijeća ministara BiH,
- Fatima Miletić i Simonetta Silvestri, EUPM,
- Jasna Dragičević, Misija OSCE-a u BiH,
- Nedim Hogić, USAID PSP u BiH,
- predstavnici sredstava informiranja,
- Aida Kreho i Alma Salkić Mijić, Zakonodavno-pravni sektor PSBiH,
- Medina Delalić, Sektor za odnose sa javnošću PS BiH,
- Dragica Hinić, sekretar i Jovica Katić, stručni saradnik u Zajedničkoj komisiji za odbranu i sigurnost BiH.

Sjednicom je predsjedavao **Branko Zrno**, predsjedavajući Zajedničke komisije za odbranu i sigurnost BiH. Upoznao je članove Komisije s dnevним redom predviđenim za ovu sjednicu i predložio da se u okviru tekućih pitanja, kao posljednja tačka, razmatra poziv Misije OSCE-a za bilateralnu posjetu članova Zajedničke komisije institucijama vlasti Republike Rumunije. Članovi Komisije prihvatili su ovu dopunu, te je konstatirano da 48. sjednica Zajedničke komisije za odbranu i sigurnost BiH ima sljedeći

DNEVNI RED

1. Usvajanje Zapisnika 47. sjednice Zajedničke komisije;
2. Razmatranje Prijedloga zakona o izmjenama i dopunama Zakona o službi u Oružanim snagama BiH, prva komisijska faza (predlagač: poslanik Sefer Halilović);
3. Davanje mišljenja o Inicijativi poslanika Sefera Halilovića za dostavljanje kompletne informacije o stanju pripadnika Oružanih snaga BiH kojima u toku 2010. godine ističe ugovor i prijedlogu rješenja za ove pripadnike;
4. Izvještaj o radu Odbora za žalbe građana na rad policijskih službenika BiH za period septembar-decembar 2009. godine (predlagač: Odbor za žalbe građana);
5. Razmatranje Informacije o sankcioniranju izvršilaca verbalnih i fizičkih nasrtaja na novinare u BiH i prijedlog mjera (sačinilac: Ministarstvo sigurnosti BiH);
6. Ponovno razmatranje Izvještaja o radu Državne agencije za istrage i zaštitu (SIPA) za devet mjeseci 2009. sa izjašnjenjem, u skladu sa smjernicama 69. sjednice Predstavničkog doma PSBiH (sačinilac: Državna agencija za istrage i zaštitu);
7. Informacija o realiziranju biletaralnih razgovora iz oblasti odbrane između delegacije Ministarstva odbrane BiH i Ministarstva odbrane SAD-a (sačinilac: Ministarstvo odbrane BiH);
8. Tekuća pitanja:
 - a) Ponovno razmatranje Izvještaja o učešću na regionalnoj konferenciji o temi „Jačanje sigurnosne saradnje za što skoriji pristup Jugoistočne Evrope Evropskoj uniji, Tirana, 7.i 8.12.2009.;
 - b) Informacija o održanoj Drugoj konferenciji o temi „Aktuelno stanje sigurnosti u BiH“, 17.i 18.12.2009., Banja Luka;
 - c) Poziv za učešće jednog predstavnika Zajedničke komisije u „Mil to Mil“ BiH-10130 Programu veterana (FAM), 7.-13.3.2010., Vašington;
 - d) Poziv za učešće na seminaru o sigurnosnoj politici, 16. i 17.3.2010., Sarajevo;
 - e) Poziv za učešće na „STARLINK“ kursu o reformi sigurnosnog sistema, RACVIAC-Zagreb, od 22. do 25.3.2010.;
 - f) Informacija o pozivu Misije OSCE-a za bilateralnu posjetu članova Zajedničke komisije institucijama vlasti Republike Rumunije.

Ad. 1. Usvajanje Zapisnika 47. sjednice Zajedničke komisije

Kako nije bio primjedbi na predloženi tekst, Zajednička komisija je jednoglasno, sa sedam glasova „za“, usvojila Zapisnik 47. sjednice Zajedničke komisije.

Ad. 2. Razmatranje Prijedloga zakona o izmjenama i dopunama Zakona o službi u Oružanim snagama BiH, prva komisijska faza (predlagač: poslanik Sefer Halilović)

Branko Zrno istakao je da se Prijedlog zakona razmatra u skraćenoj parlamentarnoj proceduri, nakon čega je dao riječ predlagaču Zakona.

Sefer Halilović naveo je da je cilj izmjena i dopuna Zakona nalaženje zakonskog rješenja za zbrinjavanje pripadnika Oružanih snaga BiH koji su u profesionalnoj vojnoj službi posljednjih skoro 20 godina, a nisu blizu ostvarivanja uslova za penzionisanje. Ocijenio je da će se pomenuta kategorija lica koja je njime obuhvaćena jako teško snaći u civilnom životu, nakon toliko godina profesionalne vojne službe. Stoga predložene izmjene i dopune Zakona predstavljaju jedan od načina na koji se ovo pitanje može riješiti, te očekuje i da se u eventualnoj amandmanskoj fazi predloženi tekst još poboljša.

Branko Zrno mišljenja je da se radi o izuzetno kompleksnom problemu, jer je ovaj prijedlog zakona dat u vrijeme kada je proces tranzicije unutar OSBiH već počeo i prvi njegovi efekti su već poznati. Napomenuo je da je Zajednička komisija za odbranu i sigurnost BiH prije otprilike godinu dana pokušavala na neki način ozakoniti zbrinjavanje pripadnika OSBiH, ali nažalost, na taj proces nije uspjela bitno uticati.

Hazim Rančić zamolio je zamjenicu ministra odbrane BiH da mu odgovori na pitanje koliko je vojnika otpušteno, koliko ih je iz oficirskih činova premješteno u podoficirske, te o kojem se Trust fondu radi kada je ovaj proces u pitanju.

Adem Huskić je ovo pitanje ocijenio kao izuzetno važno i naveo da se i Komisija zajedno s Ministarstvom odbrane BiH već duže vremena bavi njime, nastojeći pri tome da se predlože najbolja rješenja za što veći broj ovih lica. Zato je konstatirao da je najbolje uraditi ono što Ministarstvo odbrane BiH predlaže i zaključio da bi dobro bilo pričekati današnju odluku Vijeća ministara BiH o ovom pitanju.

Selim Bešliagić u svojoj diskusiji upitao je zamjenicu ministra odbrane BiH kako bi pozitivno očitovanje Komisije o ovom zakonu uticalo na buduće dobivanje Akcionog plana za članstvo (MAP) u NATO.

Slobodan Šaraba pitao je kakav je stav Ministarstva odbrane BiH o konkretnom prijedlogu zakona.

Ivu Miru Jovića zanimalo je da li u ovom trenutku u okviru Ministarstva odbrane BiH ima podoficira koji imaju 45 godina i ako ima, da li postoji mogućnost da se tim licima omogući nesmetan odlazak u penziju. Sugerirao je da se od predviđenog otpusta spase prije svega stariji ljudi, od 42, 43 ili 44 godine starosti.

Marina Pendeš, zamjenica ministra odbrane BiH, odgovarajući na pitanja postavljena tokom rasprave, podsjetila je prije svega na popunjenost Oružanih snaga BiH, kao i na činjenicu da je Ministarstvo odbrane BiH prošle godine raspisalo konkurs za popunu već ranije upražnjenih mjesta na pozicijama vojnika, te da se prijem novih vojnika desio početkom ove godine. Ministarstvo odbrane BiH je u nekoliko navrata, kroz parlamentarnu proceduru, predlagalo načine za rješavanje i zbrinjavanje pripadnika OSBiH koji u skladu s postojećim Zakonom ne mogu produžiti svoje ugovore o profesionalnoj vojnoj službi. U pogledu usvojenih i odobrenih planova kroz koje je bila jasna intencija zbrinjavanja ljudi, navela je da je za određena deficitarna zanimanja, kao što su demineri, vojni policajci ili kuhari, već u fazi produženje ugovora, a zbog same dalje operativnosti OSBiH. Dijelu vojnika koji su bili raspoređeni u taj čin prije tri godine usljed neispunjavanja uslova, prvenstveno sticanja IV. stepena stručne spreme, a koji su taj stepen stekli u međuvremenu, vraćeni su podoficirski činovi koje su prije toga imali. Do kraja godine Ministarstvo odbrane BiH računa da će, u skladu s ranije usvojenim planom, otpustiti narednih 2200 ljudi. Dalje je dala svoj komentar na čl. 101. i 102. Zakona o službi u OSBiH na koje se predlaže izmjena i dopuna ovog

zakona poziva, kao i na član 183. Zakona, koji se odnosi na sticanje uslova za penziju profesionalnih vojnih lica, navodeći da ovaj član govori da je 55 godina starosti uslov za penzionisanje. Ovo predstavlja veliki problem sa aspekta profesionalizma OSBiH za sve ljude koji imaju oko 40 godina, a kojima je za penzionisanje potrebno još 15 godina. Nadalje je navela da BiH nema finansijskih sredstava, te da je njeno mišljenje da ako neko podržava rješenje ostanka ovih ljudi do ostvarivanja uslova za penziju time namjerno želi urušiti sistem. Potom je članove Zajedničke komisije upoznala sa sadržajem Mišljenja koje je Ministarstvo odbrane BiH po Prijedlogu zakona o izmjenama i dopunama Zakona o službi u OSBiH dostavilo Vijeću ministara BiH na usvajanje. Još je navela je da je iz dijelova diskusije stekla dojam da u Ministarstvu odbrane BiH rade neodgovorni ljudi, koje nije briga za sudbinu ovih ljudi, te demantirala to činjenicom da ovo ministarstvo već šest godina pokušava naći pravo rješenje, i to u saradnji s entitetskim vladama. Na kraju je navela da je Ministarstvo odbrane BiH predložilo Vijeću ministara BiH da ne podrži predložene izmjene i dopune Zakona o službi u Oružanim snagama BiH.

Sefer Halilović je u završnoj diskusiji naveo da je njegova namjera bila da se o ovom pitanju raspravlja pred PSBiH, kako bi se s njim upoznao veći broj parlamentaraca i kako bi se našlo rješenje koje je svima prihvatljivo. Prijedlog izmjena i dopuna ovog zakona nije ocijenio ka smetnju na našem putu ka NATO-u i zaključio je da se PSBiH po svojoj poziciji nalazi iznad Vijeća ministara BiH, te da ona prvobitno treba da donese odluku o ovom pitanju.

Branko Zrno saglasio se sa diskusijom Adema Huskića i istakao da je normalno da Zajednička komisija sačeka mišljenje Vijeća ministara BiH o ovom pitanju, a naročito zbog činjenice da je 1. 3. 2010. već otpuštena prva grupa vojnika i da se naredni otpust očekuje tek 19. 6. 2010. Stoga je predložio da Zajednička komisija od Kolegija Predstavničkog doma PSBiH zatraži produženje roka za dostavu mišljenja o ovom zakonu do dostave mišljenja Vijeća ministara BiH i da se tek po dobivenom mišljenju očituje o njemu.

Zajednička komisija izjasnila se potom o prijedlogu Branka Zrne. Sa sedam glasova „za“, bez glasova „protiv“ i dva „suzdržana“ glasa“, uz dovoljnu prostu većinu, ali bez glasova „za“ članova Komisije iz srpskog naroda, nije podržala prijedlog Branka Zrne.

Kako navedeni prijedlog nije usvojen, Komisija se u skladu s poslovničkom procedurom izjasnila o Prijedlogu zakona u prvom čitanju.

Sa šest glasova „za“, dva glasa „protiv“ i jednim „suzdržanim“ glasom, uz dovoljnu prostu većinu, ali bez glasova „za“ članova iz srpskog naroda, Zajednička komisija nije podržala principe Prijedloga zakona o izmjenama i dopunama Zakona o službi u Oružanim snagama BiH, te je negativno Mišljenje s obrazloženjem uputila u daljnju parlamentarnu proceduru.

**Ad. 3. Davanje mišljenja o Inicijativi poslanika Sefera Halilovića
za dostavljanje kompletne informacije o stanju pripadnika
Oružanih snaga BiH kojima u toku 2010. godine ističe ugovor
i prijedlogu rješenja za ove pripadnike**

Branko Zrno naveo je da Zajednička komisija od Ministarstva odbrane BiH ne traži posebno Informacije o stanju pripadnika OSBiH kojima u toku 2010. godine ističe profesionalni ugovor, s obzirom da ih dobiva redovno na mjesečnoj bazi.

Sefer Halilović naveo je da bi PSBiH trebalo da dobije kompletnu informaciju o ovom pitanju, kako bi se Predstavnički dom o njoj mogao korektno i na pravilan način izjasniti.

Branko Zrno je, zaključujući raspravu, predložio da Komisija podrži ovu inicijativu, te da se prijedlog Sefera Halilovića korigira i glasi: „Predstavnički dom Parlamentarne skupštine BiH zahtijeva od Vijeća ministara BiH da dostavi kompletnu informaciju o stanju pripadnika Oružanih snaga BiH kojima u toku 2010. ističe ugovor i predloži rješenja ovog pitanja, kako bi se na narednoj sjednici Doma obavila rasprava o ovom važnom pitanju i donijele odluke“, i predloži Predstavničkom domu da prihvati navedeni preformulirani tekst Inicijative, te po dostavljanju kompletne informacije obavi raspravu.

Članovi Komisije jednoglasno su, s devet glasova „za“, prihvatili prijedlog Branka Zrne.

Ad. 4. Izvještaj o radu Odbora za žalbe građana na rad policijskih službenika BiH za period septembar-decembar 2009. godine (predlagač: Odbor za žalbe građana)

Kako o ovom materijalu nije vođena posebna rasprava, predsjedavajući je pozvao članove Komisije da se izjasne o Izvještaju.

Članovi Zajedničke komisije su potom jednoglasno, s devet glasova „za“, usvojili Izvještaj o radu Odbora za žalbe građana na rad policijskih službenika BiH za period septembar-decembar 2009. godine.

Ad. 5. Razmatranje Informacije o sankcioniranju izvršilaca verbalnih i fizičkih nasrtaja na novinare u BiH i prijedlog mjera (sačinilac: Ministarstvo sigurnosti BiH)

Selim Bešliagić istakao je da je u pitanju inicijativa koju je podnio njegov kolega iz Kluba poslanika SDPBiH, te da je u konsultaciji s njim došao do zaključka da se radi i o nepotpunoj informaciji u smislu da ne sadrži cjelovite podatke o izvršiocima.

Vinko Zorić naveo je da se informacija prima k znanju, a da prijedlog mjera koji proizilazi iz nje treba biti usklađen sa zakonskim odredbama. Podsjetio je da Komisija redovno od Ministarstva sigurnosti BiH dobiva informaciju o stanju sigurnosti u BiH, te zaključio da novinare ne bi trebalo izdvajati kao posebnu kategoriju koja bi trebalo da bude obrađena posebnom informacijom. Ako napadi navedeni u Informaciji imaju tendenciju smanjenja, onda je mišljenja da institucije sigurnosti dobro rade svoj posao. Još je naveo da on osuđuje sva lica koja verbalno i fizički napadaju novinare, ali osuđuje i postupke novinara koji verbalno napadaju građane BiH, kao i parlamentarce, nazivajući ih pogrđnim imenima.

Drago Kalabić ovu informaciju neće podržati iz protesta, iako se ona, u skladu s poslovnim odredbama, ne usvaja nego samo prima k znanju. Sigurno je da niko neće podržati nasrtaje na novinare, ali je saglasan i s konstatacijom Zorića da ih ne treba izdvajati od ostalih kategorija koje rade svoj posao. Kao razlog nepodržavanja ove informacije naveo je da su se određeni mediji vratili u devedesete godine prošlog vijeka i stali u službu podjele društva govoreći uvredljivo, jezikom mržnje, konstatirajući da oni time nanose ogromnu štetu društvu, od koje se ono neće lako oporaviti. Takvim nastupom oni ne doprinose ničim dobrom, ne podižu društvene standarde i vuku nas nazad u vrijeme koje se ne smije ponoviti. Stoga je zaključio da, ako neke njegove kolege to moraju, on ne mora šutjeti i javno govori o medijskom teroru pojedinih medijskih kuća.

Hazim Rančić naveo je da je nesporno da svi građani BiH treba da uživaju svaku vrstu sigurnosti. Osvrnuo se na zaključke usvojene u Predstavničkom domu PSBiH i analizirao ovu informaciju po izvršenim krivičnim djelima, prekršajima, kao i krivičnim i prekršajnim prijavama koje su podnijeli policijski organi. Naglasio je da su pojačane mjere osiguranja novinara kojima je ugrožena sigurnost. Zaključio je da je, na osnovu zaključaka koji su usvojeni u Predstavničkom domu PSBiH, Informacija prihvatljiva, te da se o njoj po potrebi eventualno može voditi veća rasprava u domovima PSBiH.

Slobodan Šaraba naveo je da Komisija danas razmatra Informaciju u kojoj se treba osuditi napad na novinare, ne upuštajući se pri tome u uređivačku politiku pojedinih medija. Informaciju je ocijenio korektnom ali prijedlog mjera nazvao lošim, s obzirom da nije naveden konkretan prijedlog mjera, nego je to samo uopćeno napisano. Stoga je predložio da se od Ministarstva sigurnosti BiH zahtijeva sačinjavanje konkretnog preciznog prijedloga mjera.

Šefik Džaferović naveo je da pitanje medijske slobode i uređivačke politike treba izdvojiti od verbalnih i fizičkih napada na novinare i naglasio da nema tog postupka novinara koji može opravdati bilo kakav verbalni ili fizički napad na njega. Saglasio se sa diskusijom Slobodana Šarabe i predložio da Komisija primi ovu informaciju k znanju, osudi svaki verbalni i fizički napad na novinare, a od Ministarstva sigurnosti BiH zatraži konkretan prijedlog mjera.

Drago Kalabić je, replicirajući je na navode Džaferovića o neophodnosti medijske slobode i uređivačke politike i zaključujući da se, ako se mediji u većini emisija o političarima izjašnjavaju kao o kriminalcima i lopovima, onda u cjelokupan posao treba uključiti i Tužilaštvo BiH, kao i nadležni sudovi. Ocijenio je da neki novinari, koristeći termine kao što su „fašista“, „zlikovac“ ili „bandit“, ulaze u sigurnosni rizik naglašavajući duboko neslaganje s takvim načinom izvještavanja.

Ivo Miro Jović ocijenio je da se ovo pitanje odnosi neposredno na domen ljudskih prava, te naveo da Zajednička komisija za ljudska prava, prava djeteta, mlade, imigraciju, izbjeglice, azil i etiku prevashodno treba da se bavi ovim problemom. Sigurnost ljudi u BiH treba nužno biti predmet rada ove komisije, ali izdvajanje samo ovog segmenta spada u domen zaštite ljudskih prava. Saglasio se sa diskusijama svojih prethodnika, ocjenjujući u negativnom kontekstu rad nekih medijskih kuća. Zaključio je da u BiH postoje mediji koji su svojim lažnim i huškačkim izvještavanjima nanijeli više zla nego sam rat.

Šefik Džaferović je, u svojoj replici, naveo da Komisija danas raspravlja o verbalnim napadima i prijetnjama fizičkim napadima na novinare, osuđujući ih kao nedopustive i

navodeći da ništa ne može opravdati bilo kakve prijetnje i fizičke napade, koji jesu prvenstveno pitanje sigurnosti svih građana u BiH.

Branko Zrno je, zaključujući raspravu, naveo da se tokom rasprave izašlo iz okvira teme, te se saglasio s navodima iz diskusije da se ovo pitanje direktno tiče ljudskih prava. Predložio je da Komisija ovu informaciju primi k znanju i uputi je u daljnju parlamentarnu proceduru s prijedlogom Predstavničkom domu PSBiH da je primi k znanju, uz zaključak kojim Dom zahtijeva od Ministarstva sigurnosti BiH da sačini konkretan i precizan prijedlog mjera, s obzirom da je dati prijedlog mjera općenit i neprecizan.

Zajednička komisija potom je jednoglasno, sa osam glasova „za“, prihvatila prijedlog Branka Zrne.

Ad. 6. Ponovno razmatranje Izvještaja o radu Državne agencije za istrage i zaštitu (SIPA) za devet mjeseci 2009. sa izjašnjenjem, u skladu sa smjernicama 69. sjednice Predstavničkog doma PSBiH (sačinilac: Državna agencija za istrage i zaštitu)

Branko Zrno informirao je prisutne da je Komisija u poslovničkoj nedoumici, s obzirom da SIPA nije dostavila dopunjeni izvještaj koji je Komisija zatražila na prethodnoj sjednici. Stoga se nema na osnovu čega otvoriti nova rasprava, te je predložio da se razmatranje ove tačke dnevnog reda odgodi i planira za narednu sjednicu Komisije, kako se ne bi kršile odredbe Poslovnika, kao i usvojeni zaključci Komisije, te da SIPA u međuvremenu u što kraćem roku, a ne dužem od 10 dana, dostavi Komisiji dopunjeni izvještaj, uz obavezno prisustvo direktora SIPA-e narednoj sjednici, kako bi se tom prilikom obavila rasprava i predložili odgovarajući koraci.

Mirko Lujčić, direktor SIPA-e, naveo je da se Izvještaj o radu SIPA-e za cijelu 2009. godinu, u skladu s internim aktima SIPA-e, nalazi na razmatranju na Odboru za unutrašnju politiku SIPA-e, te da će nakon toga biti prosljeđen na razmatranje i usvajanje Vijeću ministara BiH.

Zajednička komisija potom je jednoglasno, sa osam glasova „za“, prihvatila zaključak Branka Zrne, čime je rasprava o ovoj tački odgođena za narednu sjednicu Komisije.

Ad. 7. Informacija o realiziranju biletaralnih razgovora iz oblasti odbrane između delegacije Ministarstva odbrane BiH i Ministarstva odbrane SAD-a (sačinilac: Ministarstvo odbrane BiH)

Zajednička komisija primila je k znanju Informaciju o realiziranju biletaralnih razgovora iz oblasti odbrane između delegacije Ministarstva odbrane BiH i Ministarstva odbrane SAD-a.

Ad. 8. Tekuća pitanja:

- a) **Ponovno razmatranje Izvještaja o učešću na regionalnoj konferenciji o temi „Jačanje sigurnosne saradnje za što skoriji pristup Jugoistočne Evrope Evropskoj uniji, Tirana, 7. i 8.12.2009.**

Branko Zrno naveo je da u vezi sa Izvještajem postoje dva rješenja i to da se Izvještaj usvoji ili da se bez ikakvih posljedica ovo pitanje konačno skine s dnevnog reda i stavi van procedure, s obzirom da ono nikoga ne obavezuje.

Selim Bešliagić ocijenio je da je tekst Deklaracije sasvim prihvatljiv, ali s obzirom da ona smeta kolegama iz srpskog naroda i da se ne traži nikakva njena daljnja ratifikacija, on predlaže da se procedura po ovom izvještaju završi.

Šefik Džaferović predložio je da Komisija bez upuštanja u daljnu elaboraciju ovaj izvještaj stavi ad acta. Pojasnio je da je Kolegij Zajedničke komisije početkom prošle godine bio na jednoj sličnoj konferenciji, također u Tirani, prilikom čega nisu potpisali predloženu deklaraciju, s obzirom da je Kosovo bilo jedna od zemalja učesnica i da je u toj deklaraciji, između ostalog, stajalo da se zemlje učesnice ohrabruju da priznaju Kosovo. On je ukazao ostaloj dvojici kolega na tu rečenicu, te je stoga delegacija BiH tada nije potpisala jer nije bilo konsenzusa. Ipak, ovu deklaraciju, koju je potpisao Adem Huskić, nazvao je drugačijom, jer u njoj nema ništa neprihvatljivo.

Slobodan Šaraba istakao je da će ovaj izvještaj usvojiti samo ako se Adem Huskić odrekne onoga što je potpisao. Nije saglasan sa diskusijom Džaferovića, navodeći da je sporan svaki pasus ove deklaracije u kojem se spominju delegacije država učesnica, među kojima je bilo i Kosovo, koje BiH nije priznala.

Drago Kalabić naveo je da se ovdje radi o izvještaju, o kojem se mora glasati, te postavio pitanje ko je ovdje bio ovlašten da potpiše ovakav jedan dokument, smatrajući da je ovaj dokument potpisan potpuno neovlašteno. Naveo je da sve delegacije koje idu van BiH zakazuju sastanke kod Ministarstva vanjskih poslova BiH, kako bi od ove institucije, koja je zadužena za vanjsku politiku BiH, dobile smjernice kakve stavove treba da zauzimaju o određenim pitanjima.

Adem Huskić podsjetio je da je on pored svog potpisa stavio zvjezdicu, gdje je u fusnoti naveo da njegov potpis ničim ne prejudicira budući status Kosova kao nezavisne države. Još je naveo da su svi znali za sadržaj deklaracije prije održavanja same Konferencije, te da se stoga postavlja pitanje zašto je ova delegacija uopće poslana u Tiranu. Pojasnio je da je Ivo Miro Jović bio također za potpisivanje ove deklaracije, dok Mirko Okolić nije, te da je delegacija BiH tražila da se u njenoj preambuli izbrišu imena zemalja učesnica, što je organizator udovoljio Bosni i Hercegovini, nakon čega je on i potpisao ovu deklaraciju, ne ocjenjujući je nadalje uopće spornom. Naveo je da je njegov zaključak da se ovaj izvještaj zloupotrebljava u predizborne svrhe.

Ivo Miro Jović ocijenio je da je napravljena velika greška u smislu da je delegacija PSBiH poslana na konferenciju gdje je pozvano i Kosovo. Tom prilikom došlo je do potpisivanja Deklaracije, koja je predstavljala želju Parlamenta Republike Albanije da s ove konferencije izađu s dokumentom koji će opravdati njeno održavanje.

Nakon rasprave, predsjedavajući Komisije dao je na glasanje ovaj izvještaj. S jednim glasom „za“, četiri „protiv“ i tri „suzdržana“ glasa, Komisija nije usvojila Izvještaj o učešću na Regionalnoj konferenciji o temi „Jačanje sigurnosne saradnje za što skoriji pristup Jugoistočne Evrope Evropskoj uniji.

Nakon glasanja, **Drago Kalabić** istakao je da SNSD ubuduće neće dati saglasnost ni za jedno putovanje na neku konferenciju van BiH ako u vezi s nastupom na toj konferenciji nema već ranije usaglašenog stava i konsenzusa. Naveo je da se i u ovoj konkretnoj situaciji ništa loše ne bi desilo da BiH nije potpisala ovu deklaraciju, te da njemu nije smetao potpis Adema Huskića, već činjenica da se tri člana delegacije nisu mogla usaglasiti o jedinstvenom nastupu na Konferenciji. Zaključio je da ovakve delegacije PSBiH više ne mogu nastupiti na sličnim skupovima bez prethodnog stava Ministarstva vanjskih poslova BiH o pitanjima koja se odnose na vanjsku politiku BiH.

Šefik Džaferović naveo je da je ova konferencija jedno veliko iskustvo svim delegacijama PSBiH i da treba biti pouka za svaki naredni sličan nastup.

b) Informacija o održanoj Drugoj konferenciji o temi „Aktuelno stanje sigurnosti u BiH“, 17. i 18.12.2009., Banja Luka

Branko Zrno istakao je da je ova konferencija bila izuzetno dobra, uz konstataciju da joj se odazvao veliki broj stručnih lica, ali i podsjetio da je Konferenciji prisustvovao veoma mali broj članova Zajedničke komisije za odbranu i sigurnost BiH. Upoznao je članove Komisije da su zaključci, koji čine sastavni dio ove informacije, proslijeđeni učesnicima ove konferencije, na koje oni u određenom vremenu nisu dali nikakve sugestije za eventualnim ispravkama, čime su ih oni na taj način prihvatili. S tim u vezi zamolio je i članove Komisije da prime ovu informaciju k znanju, podržavajući na taj način i zaključke navedene u Informaciji.

Zajednička komisija zatim je primila k znanju Informaciju o održanoj Drugoj konferenciji o temi „Aktuelno stanje sigurnosti u BiH“, Banja Luka, 17. i 18.12.2009.

c) Poziv za učešće jednog predstavnika Zajedničke komisije u „Mil to Mil“ BiH-10130 Programu veterana (FAM), od 16. do 22. 5. 2010., Vašington

Dragica Hinić podsjetila je da je razmatranje ovog poziva prolongirano za ovu sjednicu kako bi se dobile dodatne informacije na koga se ovaj poziv za prisustvo odnosi, da li na članove Komisije ili na nekog iz Sekretarijata Komisije. Navela je da je u međuvremenu izvršila konsultacije sa Uredom za odbrambenu saradnju Evropske komande SAD-a (ODC) i da su organizatori istakli da ne žele prejudicirati na koga se poziv tačno odnosi. Još je navela da je Sekretarijatu Komisije dostavljen novi dopis u kojem je izmijenjen termin, navodeći da će se ovaj program, umjesto od 7. do 13. 3. 2010. , održati od 16. do 22. 5. 2010.

Šefik Džaferović naveo je da je najbolje rješenje da učesnik ovog programa bude neko iz Sekretarijata Komisije, jer se ovdje radi o kontinuitetu učešća.

Branko Zrno saglasio se s konstatacijom Džaferovića i predložio da u ovom programu učestvuje Jovica Katić, stručni saradnik u Komisiji, što je jednoglasno prihvaćeno.

d) Poziv za učešće na seminaru o sigurnosnoj politici, 16. i 17.3.2010., Sarajevo

Zajednička komisija odlučila je da u radu Seminara o sigurnosnoj politici, koji će 16. i 17. 3. 2010. biti održan u Sarajevu, učestvuje Branko Zrno, predsjedavajući Zajedničke komisije za odbranu i sigurnost BiH.

e) Poziv za učešće na „STARLINK“ kursu o reformi sigurnosnog sistema, RACVIAC-Zagreb, od 22. do 25.3.2010.

Zajednička komisija jednoglasno je predložila kolegijima domova PSBiH da na „STARLINK“ kursu o reformi sigurnosnog sistema, koji će biti održan u Zagrebu, od 22. do 25. 3. 2010., učestvuje Branko Zrno.

f) Poziv Misije OSCE-a za bilateralnu posjetu članova Zajedničke komisije institucijama vlasti Republike Rumunije

Jasna Dragičević iz Misije OSCE-a u BiH upoznala je članove Komisije da je ova posjeta planirana u radnoj sedmici između 12. i 16. 4. 2010., te zamolila članove Komisije da izaberu delegaciju u kojoj bi bilo šest članova i dva predstavnika sekretarijata Komisije.

Članovi Zajedničke komisije potom su kolegijima domova PSBiH odlučili predložiti da se u ovu posjetu upute: Branko Zrno, Šefik Džaferović, Slobodan Šaraba, Adem Huskić, Drago Kalabić i Vinko Zorić.

ZAPISNIK SAČINILA

Dragica Hinić

PREDSJEDAVAJUĆI KOMISIJE

Branko Zrno